

農

書

農書卷上

漣川沈氏原本

逐月事宜

正月 立春 雨水

天晴 墾田 種桑秧 敲菜麥溝 倒地 簞泥 下地墾

修桑刮蟻 倒芋芳田 澆菜麥

陰雨 修桑刮蟻 簞泥 載壅 簞田泥 劈柴 撒蠶草

秧界繩 編蠶簾蠶簀

雜作 窖垃圾 窖磨路

置備 鐵扒鋤頭 桑剪 買糞 蘇杭 買柴炭 鋤蒲 裝衣

簪帽 糴豆泥 角直 買糟燒酒 蘇州

二月 驚蟄 春分

天晴 倒地 刮蟻 下菜壅 倒田 鋤溝 澆蘇秧 簞

泥 到溝 倒秧田

陰雨 修桑刮蟻 做脰修塿 鋤溝 簞泥 修圩岸 勞

柴 搭地壠 鋸車扉 簞田泥 載壅 細桑繩

架山繩 撒柴

雜作 接樹 桑 看出蛀屑 下瓜蒟子 下菱種 排韭 沉

麻子 取足修船打索之用

置脩 噴工剪桑 催忙月人工 糴螺螄入池 修好筐筴

換炭 買芥菜鹽 買小鴨 買糊箔紙 切忌用字紙

三月 清明 穀雨

天晴 刈地 沉梅 荳晚荳 墾花草田 澆桑秧 簍泥

倒田 種芋艿 倒荳坂

陰雨 害花草 做秧田 刮二蟻 鋸車屏 載壘 簍田

泥 把桑繩 劈柴

雜作 僱匠做車 買鶴膝 前此日短 後此工忙 修蠶具 車仗 并絲車 種麥

釘菱簍 并菱梗 捉蛭虫 種瓜 秧 并蒲荳 浸種穀

置備 茶葉 醃芥菜 買水梳

四月 立夏 小滿

天晴 剝地 白地 豈地 謝桑 刨花草田 壓桑秧 種茄

倒地 剪桑 并修截 澆桑秧 沉晚豈 看三蟻 收

菜麥 種芋 苳秧 帶露 做秧田 下種穀

陰雨 看三蟻 拆麥 埧 窖蠶沙梗 刈麥 下田 窖蠶

豈梅 看秧水

雜作 架瓜 豈棚 澆瓜 茄 并豈 葡秧 沉赤豈 雨後看地 澆

桑秧

置備 買糞 謝桑 買牛 堆厩路 平望 醃青菜 買繭黃 南潯

買蒜苗 買蠶蟻入池

五月 芒種 夏至

天晴

到地

澆桑秧

澆瓜茄秧

并荳葡等惟夏至後半月不可澆灌

陰雨

拔地草

挑草泥

斫地塹

并墜脚

下田

拔秧

種

田

雜作

打菜油

拔桑附枝

并勾菜

置備

羅大麥

長興減浦

買蔴苧布

買蒜

醋用

醃梅子

燻

楊梅

買醬鹽

六月

小暑

大暑

天晴

到地

拔梅荳

壅倒種菜地

伏內

捏頭蟻

鋤田

陰雨

下田

雜作

到晚荳

斫黃蔴梗

收藏種子

蠶荳梅荳大小

種麥

置備

合醬

晒醬油

定枯桑葉

買菜瓜入醬

買勒魚入糟

做

瓜乾

做豉

七月

立秋

處暑

天晴

到地

盤田

芸田

捏二蟻

修桑

把桑

陰雨

下田

修桑

把桑

捏蟻

載壅

雜作

下接力

下麥秧

并胡蘿蔔

合魚叢

種葱

下菜秧

置備

買羊草

上路

八月

白露

秋分

天晴

到地

做泥磚

割地

下地壅

挑河泥

箒泥

剛胡蘿蔔

下白蘿蔔

撒菜秧

種菜

陰雨 斫地攤蘆草 簡地梗泥 絞籐簽 押簾繩并糞桶

雜作 翻千年久去根 捉蛀蟲 抹車油 押簾 修船 沉

蠶豈地攤 撒花草子 下寒豈田塍 接桃樹 線鷄

置備 買籐簽并稻杠 買稻鋏并鎌刀 買篩簍 合酒麴 買

菜鹽 買辣火 糴桂花 醃菱梅

九月 寒露 霜降

天晴 墾地 斫早稻 沉蠶豈 墾麥埕 簡泥 勒葉

拔晚豈

陰雨 挑泥磚到家 做稻場 打稻巴 截壅 簡泥 押

床簀 絞繩索

雜作 捉蛭蟲 鋤竹地 修竹 挑稻稈泥 伏鷄鶩蛋 做絮

置備 買牛壅 平望 買絮骨 糟茄薑 烘青豆 買菜莢

籀曰

十月 立冬 小雪

天晴 斫稻 壅麥塢 沅麥種菜 澆菜麥 及蘿蔔菜 晒穀 壅

地

陰雨 刈稻 做米 斫蘆 縛圓 絞繩索 篋泥

雜作 拔赤晚荳 種芥菜青菜 起芋藏種 採菱畱種

起魚叢

置備 買枯葉 桐鄉海寧 買草柴 山裏 買牛壅 平望 租窖 各鎮

醃菜乾

做酒

十月白

做蘿蔔菜乾

十一月

大雪

冬至

天晴

墾菜塢

種菜

提菜麥溝

種大小麥

晒穀

墾地

葡泥

陰雨

做米

打米

絞繩索

縛囤

截桑傀儡

刮蟻

提溝

戴壅

葡泥

雜作

斫芋芡

戴芋葉

挑稻稈泥

藏種穀

置備

租窖

羅白糲

踏鹽蓋菜

買蟹

糟醬

買香橙

糴

礬糠炭屑

做風魚火腿

糴糠

十二月

小寒

大寒

天晴 下地墾 墾坂田 刮頭蟻 澆菜 箭泥

陰雨 箭泥 上茅茅壩 載壅 修桑 刮蟻 打米 絞繩索

雜作 了田 菜麥田 斫樹枝 削地壩 腳膝 編籬笆 車池潭

置備 買榆樹 買臘柴 換灰糞 買臘猪油 嘉興 買過地

韭秧 做好酒 做醋

運 法

古稱深耕易耨以知田地全要墾深切不可貪陰雨間工須要
晴明天氣二三層起深每工止墾半畝倒六七分春間倒二次
猶要老晴時節頭番倒不必太細只要稜層遍晒徹底翻身若
草則覆合瑜倒好若壅灰與牛糞則撒於初倒之後下次倒入
在底

土中更好

一種田之法不在乎旱水處土薄旱種每患生虫若其年有水
種田則芒種前後耕耨爲上若旱年車水種田便到夏至也不
妨只有倒平田底停當生活以候雨到而不到則車種須要一
日車水次日削平田底第三日插秧使土中熱氣散盡後無蟲
蛀之患矣凡種田總不出糞多力勤四字而墊底尤爲緊要墊
底多則雖遇水大而苗肯參長浮而不致淹沒遇旱年雖種遲
易於發作其插種之法行欲稀須間七寸段欲密密蓋足矣平
底之時有草須去盡如削不能盡必拔去而後平底蓋插下須
二十日方可下田拔草倘插時先有宿草得肥驟興秧未見活

而草已滿拔甚費力此俗所謂畝三工若揀時拔草先淨則草未生而苗已長不消二十日便可拔草草少工省此俗所謂工三畝只此兩語豈不較然況有水旱不時車戽不暇須預喚月工多喚短工攙先做起頭番做得乾淨後番次次省力今日拔草明日卽要橫鋤所謂頭番不要早二番不要遲當使草嘗無處著腳兩鋤俱要將土翻箇轉身不徒移動場屋計小暑後到立秋不過三十餘日鋤盪耘四番生活鋤二盪一耘一均勻排定總之不可免落得上前爲愈也立秋邊或盪乾或耘乾必要田乾縫裂方好古人云六月不乾田無米莫怨天唯此一乾則根派深遠苗幹蒼老結秀成實水旱不能爲患矣乾在立秋前便多乾

幾日不妨乾在立秋後纔裂縫便要車水蓋處暑正做胎此時不可缺水古云處暑根頭白農夫吃一嚇下接力須在處暑後苗做胎時在苗色正黃之時如苗色不黃斷不可下接力到底不黃到底不可下也若苗茂密度其力短俟抽穗之後每畝下餅三斗足接其力切不可未黃先下做好苗而無好稻蓋田上生二凡容易只有接力一壅須相其時候察其顏色爲農家最要機關無力之家既苦少壅薄收糞多之家每患過肥穀挑究其根源總爲壅嫩苗之故而扼要之法一在犁倒極深深則肥氣深入土中徐徐討力且根派深遠苗幹必壯實可耐水旱縱接力薄而原來壅力可以支持卽再多壅譬如健人善

飯量高多飲亦不害事此爲第一著一在多下墊底墊底多插下便興旺到了立秋苗已長足壅力已盡幹必老色必黃接力愈多愈好一在六月內乾過一番則土實根牢苗身堅老堪勝壅力而無顛倒之患但自立秋以後斷斷不可缺水水少卽車直至新稻方止俗云稻如鶯色紅金得水來供若值天氣驟寒霜早凡田中有水霜不損稻無水之田稻卽秣矣先農有言飽水是穀此之謂也

一稻種以早白稻爲上只肥壅不易調停少壅不長多壅又損質但喜其米粒粗硬而多飯所宜多種黃稻能耐水旱多壅不害只怕霜早米不圓滿其餘稻色好歹不同總無如黃白二種

所宜對平均種以便次第收斫不致忙促先農嘗卜其吉者而多種之

一壅麥塿惟乾田最好如爛田須壅過幾日待塿背乾燥方可
沉種倘時候已遲先浸種發芽以候塿乾切不可帶濕蹈實
麥不能行根春天必萎死即不死亦永不長旺沉麥蓋澤要滿
撒子要勻不可惜工而令婦女小厮苟且生活麥要澆子菜要
澆花麥沉下澆一次春天澆一次大肥反無收大麥種麥則不
厭肥又要肥在後半若八月初先下麥種候冬壅田移種每科
十五六根照式澆兩次又撒牛壅鉞溝蓋之則餘壯麥粗倍獲
厚收菜比麥倍澆又或垃圾或牛糞鉞溝蓋澆煞花即有滿石

收成種田不須墊底凡菜麥鋤溝之後候乾再到一番每畝不過半工而泥鬆碎易討力且不起草又可挨麥不患風倒

一墾地須在冬至之前取其冬月嚴寒風日凍晒必照墾田法二三層起深桑之細根斷亦無害只要稜層宏厥若倒地則春天雨水正多地面又要犁平使不滯水背後腳跡盡數操平冬天墾地草根翻在上春天墾地草根翻在下先農所謂寒則澠熱則藏也墾地倒地非天色極晴不可若倒下不晒一日卽便逢雨不如不倒爲愈至於刈地尤要大晴尤要草未生而先刈夏天約二十日一刈未草先到二十日尙未起草草多而到不十日草已茂矣一樣用此工夫常在直頭做去孰若撓先做上

頭番做得乾淨永不易起草一年計在春正此謂也西鄉只倒不到本處只到不倒也須剉深二三寸雖大陣雨不將浮泥衝淋入水若止於刮草輪面上浮下實一逢大雨盡將面泥淋剉計一年簞泥所增幾何堪此暇剉論來只宜抹倒不必拘俗也况發葉時不必日日晴未免蹈實此時決宜趁晴倒晒則黃霉不易起草萬一黃霉久雨不能剉倒若草盛宜拔去之或鋤去之地溝必開濬卸水但剉倒一番未免有泥塊落溝壅滯遇大雨後必處處看瞭有水卽開濬之雨一番看一番可也

一種桑以荷葉桑黃頭桑木竹青爲上取其枝幹堅實不易朽眼眼發頭有觔兩其五頭桑大葉密眼次之細葉密眼爲最下

又有一種火桑較別種早五六日可養早蠶凡過二月清明其
年葉必發遲候桑下蠶蠶恐後期屋前後種百餘株備用可也
種法以稀爲貴縱橫各七尺每畝約二百株株株茂盛葉便滿
百不須多也內地年前春初皆可種外地患盜者清明前種年
前種桑秧以大爲貴清明邊種桑秧以細爲貴以大桑到清明
頭眼已發根眼已盲細桑則根眼尙綻故也根不必多剝盡毛
根止畱線根數條四方排穩漸漸下泥築實清水糞時時澆灌
引出新根黃霉尤宜澆灌澆法不宜著幹當離尺許繞圍周匝
使新根向肥遠去發葉之後不時要看看若見損葉必有地蟲亟
撲殺之如遇大雨一止必逐株踏看如被泥水淹眼速速挑開

否卽死矣兩一番看一番不可忽也其剪法縱不能如西鄉樓子樣亦不可如東鄉拳頭樣試看拳頭桑桑釘眼多身如枯柴一年缺壅便不能發眼卽行閤死矣密眼桑隔半寸許五頭黃頭隔二寸許寧可有油瓶嘴另日修剪可也嫩桑不必多畱傀儡須盡截去古云孝順種竹忤逆剪桑剪桑乃一件正經事不甚費忙工夫約一年要修四番二葉初勻時不可多打葉引致嫩條軟折此時預防損抑不免多畱種田畢細看一番但多畱嫩條及新發叢葉盡情裁去到七月縛桑之際凡根下細條及了襠陰枝又一切去之至冬春修截之時又看細小不堪及蔭下繁密者又一切去之到剪桑畢又看以前碍鋸而截不盡傀儡

偏及老枝不成器者又一切去之其老油瓶嘴晴時堅硬難剪
不論冬春凡過久雨之後雨一止卽辭出修剪期於淨盡設有
瘰癧卽番去之不可愛惜使其纏染皆緣剪時刀上傳過凡桑
一瘰再無醫法斷不可留者漢人頌刺史德政曰桑無附枝甚
言修桑爲重事也桑鋸須買木匠生鐵鋸桑剪須在石門鎮買
五分一把其刮蟻也須三番冬春看頭蟻清明前看二蟻剪桑
畢看三蟻一株上百顆盡刮若遺剩一顆亦足蟻盡必如此三
番四覆亦料不能淨盡又要六月內捏頭蟻七月內捏二蟻而
頭蟻尤宜細看箇頭蟻一則二蟻便有百此時出工甚忙人每
忽畧不上緊不知葉一經蟻縱有肥瘠有工力亦不易救決宜

早早用心農家唯此項最辛苦工夫最難稽考不得不多下工
力分地各任庶可責成耳其捉蛭也須三番春分邊捉出屑蛭
秋分邊捉條了蛭剪桑畢或九月又細看細捉又有一等包捉
之人故畱大蛭不捉以待冬間出瘧之家規取厚利須時時照
瞭隨見隨捉或自備線鑿爲不時之需

一要覓藥則平望一路是其出產磨路指灰最宜田壅在四月
十月農忙之時糞多價賤當併工多買其人糞必往杭州切不可
可在壩上買滿載當在五道前買半載次早押到門外過壩也
有五六成糞且新糞更肥至於謝桑於小滿邊蠶事忙迫之日
只在近鎮買坐坑糞上午去買下午卽澆更好

一春天壅地垃圾必得三四十担在立春左右揀天色老晴土色乾燥方可倒入地面要平使不受水澆不要深則不走肥隨簡泥蓋土雖遇春雨久亦無害惟未春先下壅令肥氣浸灌土中一行根便討力桑眼飽綻個個有頭葉必倍多清明邊再澆人糞謂之撮桑澆一錢多二錢之葉剪桑畢再澆人糞謂之謝桑澆一錢多一錢之葉毫不虧本落得桑好謝桑尤是要緊工夫切不可因循

一牛糞載歸必須下潭加水作爛薄薄澆之昔平望買來乾糞須加人糞幾担或菜滷猪水俱可取其肯作爛也每畝壅牛糞四十担和薄便有百担其澆時初次澆埦旁下次澆埦背潭要

深大每潭一桶當日卽蓋若澆人糞尤要卽刻蓋潭方好牛糞
要和極薄人糞要和極清斷不可算工力主人必親監督不使
工人貪懶少和水此是極要緊所在

一古人云家不興少心齊桑不興少河泥箆泥第一要緊事不
唯一歲雨淋土剝藉補盜正由箆泥之地土堅而又鬆雨過便
乾桑性喜燥易於茂旺若不箆泥之地經雨則土爛如腐嫩眼

不行老根必露縱有肥壅亦不全盛每年冬春間箆一番

或云
箆泥

同好挑留得八月箆一番每番須六工做溝之人也不可搭
泥亦可省工頭恐做溝扒泥不及箆手亦停候矣晴天箆在大地陰天箆在
埂地雨天箆在潭裏候乾挑在遠地泥乾趁晴倒到晒曝如麥

穀樣敲碎如粉方肥

一把桑繩上好茂盛地約乾細繩八觔以下多寡有差生活人
搗繩上等一日七八觔酌中五觔

一天時大約晴七兩三晴雨各有生活獨孟春雨水之際正農
工湊聚之時除雨畱家外雨止即可修桑看蠶修岸至於墾倒
田地非大晴不可人家僱長年天雨無生活可做不得已而墾
田若有船可以簕泥定須開潭簕泥消磨雨工其田地生活必
待天晴方做

一種田地肥壅最爲要緊人糞力旺牛糞力長不可偏廢租窖
乃根本之事但近來糞價貴人工貴載取費力偷竊弊多不能

全靠租窖則養豬羊尤爲簡便古人云租田不養豬秀才不讀書必無成功則養豬羊乃作家第一著計羊一歲所食取足於羊毛小羊而足所費不過墊草宴然多得肥壅養豬舊規腐折豬本若兼養母豬卽以所賺者抵之原自無虧若羊必須僱人斫草則冬草工閒誠靡廩糈若豬必須買餅容有貴賤不時今羊肯吃枯葉枯草豬肯吃糟麥則燒酒又獲贏息有盈無虧白落肥壅又省載取人工何不爲也但養豬每苦生病病必在春夏以受暴寒盛熱鬱蒸而成欄前須空濶通風日夏不甚熱冬護其寒窠不厭穢糟須潔淨自然無害

一羊壅宜於地猪壅宜於田灰忌壅地爲其剝肥灰宜壅田取

其鬆泛若平望買猪灰及城鎮買坑灰於田未倒之前稜層之際每畝撒十餘担然後鋤倒徹底鬆泛極益田脚又取撒於花草田中一取鬆田二取護草然積瘦之田泥土堅硬利用灰與牛糞若素肥之田又忌太鬆而不耐旱不結實糞須間雜而下如草泥猪糞底則以牛糞接之如牛糞墊底則以荳泥荳餅接之然墾田果能二層起深雖過鬆無害花草畝不過三升自已收子價不甚值一畝草可墾三畝田今時肥墾艱難此項最屬便利

一田地生活上前有功除種田要看時候其餘各色俱以早爲貴假如剝地未草先剝以後草不卽起剝又省工假如拔草早

則工三畝遲則畝三工又如捏蟻捏頭蟻一省捏二蟻百至於
沉豈麥尤以早爲貴春三月內多喚短工預喚剪桑工種田工
忙月工生活次第得法仍舊省工未嘗多費廩食也

一秧田最忌稗子先將面泥刮去寸許掃淨去之然後墾倒臨
時篩泥鋪面而後撒種舊規每秧一畝壅餅一片細春與種同
撒卽以灰蓋之取其根鬆易拔今人密密佈種曰恐草從間生
耳果能刮盡面泥草種已絕不妨少疎欲其粗壯若秧色大嫩
不妨闊乾使其蒼老所謂秧好半年田謂其本壯易發生耳若
亢旱之年又不可早將秧壅興恐揀時遲而秧蒿敗也凡人家
種田十畝須下秧十三畝以防不足且備租田俗云二月清明

多下種三月清明少撒秧屢試之亦驗

一做工之法舊規每工墾田一畝鋤盪芸每工二畝當時人習
攻苦戴星出入俗柔順而主令尊今人驕惰成風非酒食不能
勸比百年前大不同矣只要生活做好監督如法寧可少而精
密不可多而草率也供結之法亦宜優厚炎天日長午後必饑
冬日嚴寒空腹難早出爰必加下點心冬必與以早粥若冬月
雨天簫泥必早與熱酒飽其飲食然後責其工程彼旣無詞謝
我我亦有顏詰之至於婦女丫環雖不甚攻苦亦須畧與滋味
曾有經月不知肉味而能無染指侵剋者古云善使長年惡使
牛又云當得窮六月裏罵長工主人不可不知 舊規夏秋每

人朝粥二合晝飯七合點心飯二合半如粥二合夜粥二合半
春冬每人朝粥二合晝飯七合點心粥三合夜粥二合半一年
中牽算每人日一升五合婦人半之猪犬別加料 舊規夏秋
一日葷兩日素今宜間之重難生活連日葷春冬一日葷三日
素今間二日重難生活多加葷 舊規不論忙閒三人共酒一
杓今宜論生活起重難生活每人酒一杓中等生活每人酒半
杓輕省及陰雨留家全無 舊規葷日齋肉每觔食八人猪腸
每觔食五人魚亦五人今宜稱明均給於中不短少侵剋足矣
舊規素食腐一塊值錢一文當年錢值銀九毫荳一石值價
五錢今錢價荳價不等豈得尙以舊例行之今後合與人人吃

腐不須付與腐錢而多與油水令工人勤種瓜菜以補其不足
舊規生活人供酒斗米買三十杓謂之長行酒水多味淡徒
爲店家出息若以斗米自做麴酒當有二十四觔以十二兩抵
長行一杓滋味力量竟是加倍所慮者自做易於耗損若頓發
於領袖做工之人計日算給似亦甚便與其利歸店家孰若加
厚長年以其糟養豬尙有燒酒出賣亦可供給長年

一湖州水鄉每多水患而渰沒無收止萬歷十六年三十六年
崇正十三年過甲之中不過三次耳嘗見沒後復種茁秧俱大
收穫比前倍好皆渰沒之後天卽久晴人得車戽茁肯長發今
後不幸萬一遭此須設法早車買苗速種其買苗必到山中燥

田內黃色老苗爲上下船不令蒸壞入土易發生切不可買翠
色細嫩之苗尤不可買東鄉水田之苗種下不易活生發既遲
卒遇霜早終成秕穗耳立秋前可種若遇天氣老晴熱氣尙盛
便過立秋幾日尙可種種下只要無草不可多做生活尤不可
下壅下壅工多則苗貪肥長枝枝多穗晚有稻無穀戒之戒之
故大水之年未種而水至則以車收爲主不救則以復種爲主
大凡滄沒之時人情洶洶必有阻惑人言勿聽而斷爲之可也
一修築圩岸增高界巔預防水患各自車戽此禦災捍患之至
計歲奉功令無容怠緩至於脚膝亦要年年做一番不唯便於
挑泥挑壅挑稻一切損苗之蟲生子每在脚膝地攤之內冬間

剗削草根另添新土亦殺蟲護苗之一法

一壅地果能一年四壅簡泥兩番深壅剗淨不荒不蟻每畝採葉八九十箇斷然必有比中地一畝採四五十者豈非一畝兼二畝之息而功力錢糧地本仍只一畝孰若以二畝之壅力合併於一畝者之事半功倍也老農云三担也是田二担也是田石五也是田多種不如少種好又省氣力又省田作家第一要勤畊多壅少種多收第二要寬恤租戶不敢退田不幸遇水旱之年度力量不能遍及者只須棄半畝半不可眷戀兩廢也記之

一長年每一名工銀五兩喫米五石五斗平價五兩五錢盤費

一兩農具三錢柴酒一兩二錢通計十三兩計管地四畝包價
值四兩種田八畝除租額外上好盈米八石平價算銀八兩此
外又有田墮短工之費以春花稻草抵之俗所謂條對條全無
贏息落得許多起早晏眠費心勞力特以非此勞碌不成人家
耳西鄉地盡出租宴然享安逸之利豈不甚美但本處地無租
例有地不得不種田不得不喚長年終歲勤動亦萬不得已而
易興易敗端爲子孫享逸思搖現錢易耗耳古云萬般到底不
如農正謂此也思之思之

蠶務 六畜附

養蠶之法以清涼乾燥爲主以潮濕鬱蒸爲忌以西北風爲貴

以南風爲忌蠶房固宜遠密尤宜疏爽晴天北風切宜開窗
牖以通風日以舒鬱氣下用地板者最佳否則用蘆蓆墊鋪使
濕不上行四壁用草簣圍襯收潮濕大寒則重幃障之別用火
缸取火氣以解寒冷此易易耳惟暴熱則外通內蒸暑熱無所
歸則蠶身受之或體換不時隈飼畧後久堆亂積遠擲高拋致
病之源皆在乎此古云風以散之則蠶室固要避風尤不可不
通風也俗忌生人者或帶酒男子或經行婦人濁氣衝之立能
致變豈神爲祟乎若能調其寒熱時其飼哺一一如法自足豐
收農家以耕織爲業自己育蠶雖亂絲薄繭均足入經緯而獲
價值所宜多養若細細計之蠶一筐火前喫葉一箇火後喫葉

一箇大眠後喫葉六箇此外蠶炭一錢盤費一錢每筐收絲一
觔纔足抵本所贏者止全官繭黃提起不穀二錢之數若收成
十分以下便不足償葉本矣故小民親身經歷不算工力盤費
則可若假手下人採桑者鼠竊狗偷喂蠶者孟盤狼藉多靡工
力墮落農務此又當照自己力量不可一例論也

一遇葉賤之年喂蠶或少便四分五分一箇只該採賣斷不可
嫌賤貴貴畱養在桑嫩桑猶可老桑畱一年頭葉根本衰壞後
雖培壅終歸朽敗萬萬不宜畱養喂蠶之家須早晚畱心審時
度勢多買出火蠶不拘一熟兩熟消磨桑葉雖薄薄收成亦勝
養葉多矣如買蠶既不及賣葉又無人買不得已而畱則採畢

仍舊剪光清糞連澆兩番自然嫩枝長茂明春加厚壅之葉仍不少斷不可仍畱老條致桑朽壞此屢試明驗斷在勿疑
一桑葉剪後至夏叢生須剛去雜枝養出長條則來歲葉盛所剛之葉可以飼二蠶

一近年夏葉竟無梢至不得不少養幾筐二蠶以防二桑葉丟空但值插種之時墮誤忙工以小妨大斷斷不宜養卽養亦斷不宜多

一男耕女織農家本務況在本地家家織絰其有手段出衆夙夜趕趁者不可料酌其常規婦人二名每年織絹一百二十疋每絹一兩平價一錢計得價一百二十兩除應用經絲七百兩

該價五十兩緯絲五百兩該價二十七兩箋絲錢家伙線蠟五兩婦人口食十兩共九十兩數實有三十兩息若自己蠶絲利尚有浮其爲當織無疑也但無頓本則當絲起加一之息絹錢則銀水差加一之色此外又有鼠竊之弊又甚難於稽考者若家有織婦織與不織總要喫飯不算工食自然有贏日進分文亦作家至計

一箋胡羊十一隻一雄十雌孕育以時少則不孕多則亂群胡羊不可一日缺食冬饑一日夏必死夏饑一日冬必死 右羊十一隻每日喫葉草四十觔每年共計一萬五千餘觔除自葉不算外白葉抵小羊食買枯葉七千觔六月內長安人來預撮葉價每

千觔三錢之外冬天去載計七千觔約價三兩 買羊草之千
觔七月內崇桐路上買算除泥塊約價四錢七千觔亦該三兩
墊柴四千觔約價二兩約共葉草八兩數 每年羊毛三十
觔之外約價二兩小羊十餘隻約價四兩可抵葉草之本 每
年淨得肥壅三百担若墊頭多更不止於此數 羊性喜燥惡
濕墊窠常要乾燥每日申時飼食一番隨與清水一大担又羊
性搶食恃強者爲勝不顧其子小羊十餘觔以外已離乳者另
棚飼之 羊指甲內每患有蟲食毛如見羊腹上毛損卽與裁
甲捉蟲否則患腳軟而斃矣用蕎麥掛梁上則羊不生虱
養山羊四隻三雌一雄每年喫枯草枯葉四千觔墊草一千觔

約本二兩數 計一年有小羊十餘隻可抵前本而有餘每年
淨得肥壅八十担餘

一餐猪六口每口喫豨餅三百觔六口計一千八百觔常價十
二三兩 大麥四百二十觔計常價十一兩該三十餘石 糟
七百觔計四千餘觔常價十二兩 小猪身本六箇約價三兩
六錢 壅窠稻草一千八百觔約價一兩共約本十六兩零每
養六個月約肉九十觔共計五百餘觔每觔二分五釐算照平
價計銀十三兩數虧折身本此共常規每窠得壅九十担一年
四窠共得三百六十担 以上算法但十年前事近來物價增不
長落種田養猪第一要緊 養母猪一口一二月喫餅九十片三
不可以餅價處遂不問也

四月喫餅一百二十片五六月喫餅一百八十片總計一歲八百片重一千二百觔常價十二兩小豬放食每箇餅銀一錢約本每窠四兩若得小豬十四個將八個賣抵前本贏落六個自養每年得壅八十担

一鷄鴨利極微但鷄以供祭祀待賓客鴨以取蛋田家不可無今計每鴨一隻一年喫大麥七斗該價二錢五分約生蛋一百八十個該價七錢果能每日飼料二合決然半年生蛋無疑人家若養六隻一年得蛋千枚日逐取給甚便 種鷺四隻一雄三雌一年喫大麥秬穀四石值價一兩八錢自中秋始至春分計一百八十日中間再聽四五十日停歇實計每隻生蛋六七

十枚三雌共生二百枚發賣包出每個二分卽賣不盡者畱作食用也值八九釐自伏小鷺更有利凡養種鷺要在六七月飽飼穀培其本壯生蛋有力或云鷺豈更佳且多生子價與穀等自養母鷄四隻冬春二季可伏四十八枚出下卽賣每小鷺一隻值價三四分若自己種菜及米粬粃穀家所必有秋天初生之卵伏出早鷺到清明邊換炭每隻價一錢四五分不唯贏息甚多且可備一年蠶炭之用

一蘇州買糟四千觔約價一十二兩糟以乾爲貴乾則燒酒多到家再上甑一番尙有渾酒二百觔雖非美品供工人亦可替省近來蘇人多算將糟下副酒放桃花酒若非真色貨燒酒便無利矣每糟百觔燒酒二十觔若

上號的有十五觔零賣每觔二分頓賣也有一分六釐斷然不
少再加燒柴一兩計酒六百觔值價十兩除本外尙少銀三兩
得糟四千觔可養猪六口凡糟燒下卽傾入缸踐實以灰蓋之
日漸取用久不易壞燒時必拌蘆糠喂時必淨去之

長興羅大麥四十担約價一十二兩先將春去粗芒水浸一宿
上午煮熱攤冷每斗用酒藥比米三倍約每斗四五釐拌勻入
罈封口貯淨處候七日開罈酒香傾出入甕一如燒酒之法每
石得酒二十觔若好的也有十五觔比米燒差覺粗猛耳每觔
分半可抵麥本酒藥燒柴斗只一分得糟二千觔養猪甚利試
照前法多養猪半年得壅八九百担比之租窖可抵租牛二

十餘頭又省徃載人工四五百工古人云養了三年無利猪富了人家不得知况糟麥燒酒更屬有利者乎畊稼之家惟此最爲要務

家常日用

一黃蘗買梅子三十觔用鹽醃過取出晒乾蒸黑貯用其汁入磁罐內封固任其或花或臭不妨候到九月內糴桂花六升傾汁拌勻桂見梅汁永不變色至十一月買黃橙十五觔細切與前桂花同拌再加熟芝麻五升收藏以備一歲之用 凡梅花茉莉甘菊諸花之香而不苦者皆可入橙點茶以諸花見橙永不變色耳

一六月內梅荳一收卽合醬黃日晒夜露隨買頭水菜瓜五十
觔用鹽十五觔揉爛拌瓜入缸用石壓定逼盡瓜汁取瓜畧晒
皮皺稍乾用醬黃二斗五升將汁拌勻同瓜入甕封口貯無日
之處

一六月內所合醬黃大伏內晒成黑醬每黃一斗入鹽四觔厚
可成團九月摘冷露茄風乾但取入醬不腐不必太乾皮皺也
每茄一觔用醬一觔拌勻入甕封固貯無日處

一九月內買薑取薑之最嫩者入糟次嫩者用麻布拭淨每薑
三觔用香油一盞熬滾入薑畧番兩三轉身卽起攤冷次日拌
醬入甕封貯

一九月內冷露茄取細小者五觔用麴酒糟六觔鹽十七兩清水一碗拌勻連茄入甕封貯糟薑亦如此法但用醋拌不用水

一四月內買蒜苗百觔醃過晒乾再多種絲瓜採下去粗皮醃過晒乾一層蒜一層瓜入甕共蒸以黑爲度取出晒乾封貯一性極熱一性極寒勻透中和甚有補益且味堪下酒田家佳品也

一蒜苗寸許爲度入醃蒜頭糟醋煨透不唯味美可以辟穢臭除瘴氣五六月間做生活人與蒜食之不生病茶中加梅與薑不受暑

一九月內西鄉晚菱拇正盛而未老去根葉淨盡水浸半日入

鍋煮熟細切筴乾搗大蒜炒鹽拌勻入甕築實直到春味尙美若菜少之年便臨採菱之拇尙可取醃當用前法可以不壞

一六月買太湖大茄少鹽煮熟烈日晒乾入甕蒸黑一如做菜乾法如青瓶樣小菜甚佳

一鹽蘆菜蘿蔔菜臺心菜每百觔用鹽三觔蹈過石壓二十日後取出晒乾入甕蒸透再晒極乾用熟香油洒菜上勻透再蒸如此兩遍以黑爲度入罈收藏不唯小菜肥甘若用猪油醬在飯鍋上頓過亦美味也老農云種鹽蘆菜法早年澆水水年澆糞則根長葉少而最嫩

一做豆豉法暑月用黑豆一斗煮熟乾細麪三觔拌勻過七日

俟色黃起出晒乾將杏仁去皮尖浸七日早晚換水陳皮浸胖去膜生瓜十觔切作細塊醃一日三項俱要晒乾加紫蘇葉瓜仁薑絲大小茴香甘草末川椒數項不拘多少甜酒醬拌勻甜三白酒亦可風乾三日再加入落滷鬆鹽鹹淡隨意上瓶封固一兩月開用宜新瓶卽酒瓶亦用若舊菜瓶醬瓶斷不可用

區田法 附

按舊說區田地一畝濶一十五步每步五尺計七十五尺每行占地一尺五寸該分五十行長一十六步計八十尺每行一尺五寸該分五十三行長濶相折通二千六百五十區空一行種一行於所種行內隔一區種一區除隔空外可種六百六十

二區每區深一尺用熟糞一升與區土相和實其底布穀勻覆以手按實令土種相著苗出看稀稠存畱鋤不厭頻旱則澆灌結秀時鋤土深壅其根以防大風搖擺古人依此布種每區收穀一斗每畝可收六十六石今人學種可減半計又參考汜勝之書及務本書謂湯有七年之旱伊尹作爲區田教民糞種負水澆稼諸山陵傾阪及田邱城上皆可爲之其區當於閒時旋掘下正月種春大麥二三月種山藥芋子三四月種粟及大小荳八月種二麥豌豆節次爲之不可貪多大率一家五口可種一畝已自足食家口多者隨數增加用省而功倍田少而收多全家歲計指期可必實救貧之捷法備荒之要務也

終

農書卷下

桐鄉張履祥念芝氏補著

桐鄉田地相匹蠶桑利厚東而嘉善平湖海鹽西而歸安烏程俱田多地少農事隨鄉地之利爲博多種田不如多治地蓋吾鄉田不宜牛耕用人力最難又田壅多工亦多地工省壅亦省田工俱忙地工俱閒田赴時急地赴時緩田憂水旱地不憂水旱俗云千日田頭一日地頭是已况田極熟米每畝三石春花一石有半然間有之大約共三石爲常耳下路湖田有畝收四五石者田寬而土滋也吾鄉田隘土地得葉盛者一畝可養蠶十數筐少亦四五筐淺故止收此地得葉盛者一畝可養蠶十數筐少亦四五筐最下二三筐若二三筐者即有豈二熟米賤絲貴時則蠶一筐即可當一畝

之息矣

米甚貴絲甚賤
尙足與田相準

雖久荒之地收梅荳一石晚豆一石近

來荳價貴亦抵田息而工費之省不啻倍之况又稍稍有葉乎

但田荒一年熟地荒三年熟人情欲速治地多不盡力其或地

遠者力有所不及耳俗云種桑三年採葉一世未嘗不一勞永

逸也弗思耳

上治地
一則

農叟有言禾歷三時故耨三節麥歷四時故耨四節種稻必使
三時氣足種麥必使四時氣足則收成厚吾鄉種田多在夏至
後秋盡而收所歷二時而已種麥多在立冬後至夏至而收所
歷三時而已欲禾歷三時麥歷四時胡可得焉惟有以下殃極早
可補事力之不逮穀雨浸種立夏前下穀稍備春氣至插青之

日秧老而苗易長且耐風日所謂秧好半年田也中秋前下麥子於高地穫稻畢移秧於田使備秋氣雖遇霖雨妨場功過小雪以種無傷也人但知夏前秧之好而不知所以好之故在得春氣備三時也知種麥之多收而不知所以多收之故在得秋氣備四時也湖州無春熟種田早收穫遲卽米多於吾鄉北方無水田麥卽廣熟非獨地燥歷時多能盡其性也况旱麥又有幾善壅溝撤溝便於早早則脫水而埤燥力暇而溝深溝益深則土益厚早則經霜雪而土疏麥根深而勝壅根益深則苗益肥收成必倍埤燥土疏溝深又爲將來種稻之利凡事利必兼利害必兼害情農苦種麥之勞耽撮子之逸甘心薄收甚至失

時春花絕望愚矣哉

上稻秧麥秧一則

四月一日陰雨見育蠶者乏乾鮮之葉男子勞於外婦女憂於內蓋晝夜皇皇也因思育蠶之家宜預作木架如松棚式廣一丈四五尺深亦如之其高過於桑上織竹如蓋於蠶初收時卽張之茂桑之上若桑樹室中然或一日而移或兩日三日而移量飼蠶之多寡而斟酌焉朝暮可避露晴可避日陰可避雨葉時時乾鮮旣省人工又不生蠶病至大眠後可輟大眠後葉老越宿經日猶鮮且又可事易集而功用多一架可備數年之用余里蠶桑之以加厚利厚於稼穡公私賴焉蠶不稔則公私俱困爲苦百倍大約蠶之生疾半在人半在天人之失恆於情情則失飼而蠶饑餓則

首亮情則失替而蠶熱熱則體焦皆不稔之徵也天之患恆於
風雨霖露卽烈日亦有不宣以乾鮮之葉難得也蠶食熱葉則
繭浮鬆不可絲其害淺食濕葉則潰死食濕熱葉則僵死食霧
露葉則痿死葉染風沙則不食葉宿則不食而仍饑其害深知
戒人之失而不知備天之患未爲全策也若天患雖備而人失
不戒則咎又將誰任哉 上蠶葉一則

農書不詳載梅荳以梅荳獨產於桐邑歸安非所講求也崇邑
塘東區分亦有之他如嘉興秀水吳江烏程海寧接境卽無非
不試之也土性非宜輒蔓而不實故惟桐鄉得擅其利六七月
陳荳做腐腐少若得撓入梅荳腐便如故每遇荳熟商賈來至

官私賴焉下種於清明後成熟於大暑前相去百日耳得利亦

最速其法有五

一曰留種宜燥不可濕氣蒸及濕氣入器

一曰挑泥宜密

泥一曰墾地宜早

冬至前後墾者泥墾而蟲凍死

一曰撒灰宜多一曰到削宜

勤五者人皆知之然撒灰少得其法梅荳根直下長不過五寸

撒灰宜在打潭撮子而未蓋土之時多撒則灰皆入潭無不遍

者然後平之以土雖遇雨亦鬆無不出之患且肥鬆只在根際

荳故易茂而結繁他日易拔若地未倒而先布灰則灰入土深

根不能及若荳苗已長而後加灰則葉碍而灰俱在四旁無及

灰者與無灰等耳荳葉荳箕頭及泥入田俱極肥以梅荳壅田

力最長而不損苗每畝三斗出米必倍但民食宜深愛惜不忍

用耳俗亦有下荳於麥垆種田時連荳之結葉折倒作壘實覺
省便但恐出遲故多不爲耳

上梅荳一則

治地必宜壓桑秧蓋桑秧出自已有則易選擇而根幹枝枝相
似隨起隨種無不活者又省一項急銀買來種者百枝只可活
四五十枝蓋百凡樹木根俱不耐凍風霜一觸生意卽傷也若
天色或遇雨雪或人工不湊更不可知矣一枝不活不足惜所
惜者又遲一年之葉且來年所種能保必活乎其法宜新填地
或近水地埂冬天挑稻稈泥一次採葉之時卽畱所欲壓之條
更近乎地俟葉頭向上而新條長卽埋入土中黃霧澆糞一次
若以羊垃圾鋪上更妙六月澆一次八月澆一次可以斷其母

而新根自長每地一分可得桑秧數百枝葉復不少得厚利而力又不費歲壓三五分以供家用必不可少記之 桑蟲捉不盡悉因捉損桑則用爆杖藥線入蛀穴以火燒之蟲聞卽死亦是一法 上壓桑一則

壅麥之法畧與海苳相似但苳只需撒灰麥則灰糞兼用麥根直下而淺灰糞俱要著根而早壅方有益壅泥亦然壅溝揪溝亦宜早俗謂冬至壅爲金溝大寒前壅爲銀溝立春後壅爲水溝揪至兩遍更好溝深則埤土厚而脫水盡田底亦愈熟故也余至紹興見彼中俱壅菜餅每畝用餅末十觔俟麥出齊每科撮少許遇雨二次長一次吾鄉有壅苳餅屑者更有力每麥子

一升入餅屑二升法與麥子同撮但麥子須浸芽出者爲妙若乾麥則豈速腐而并腐麥子近年人工既貴偷惰復多澆糞不得法則不若用餅之工糞兩省但撮餅屑須要潭深而蓋土厚否則慮有鳥雀之害惟田近民居則防鷄損及種麥秋則不得已而用糞耳鄉居稻塲及猪欄前空地歲加新泥而刮面上浮土以壅菜蓋麥最肥有力 秀水北區常於八九月簍泥壅田中菜此法最好日長而工閒土肥而糞省農人不勞而菜茂來年禾復易長 油菜防盜取以牛糞入潭作爛澆之則菜臭而人不偷矣 上壅麥菜一則

天只一氣地氣百里之內卽有不同所謂陽一而陰二也正如

一父之子所受母氣不同則子之形貌性情亦從而異吾鄉田
宜黃稻早黃晚黃皆歲稔白稻惟早糯歲稔粳白稻遇霧卽死
然自烏鎮北漣市西卽不然蓋土性別也耕種之法農書已備
惟當悉於赴時同此工力肥壅而遲早相去數日其收成懸絕
者及時不及時之別也俗曰早蠶早田爲第一下鄉田低無春
花故利遲吾鄉春花之利居半若蠶豈小麥遲俱薄收也田家
忌三小小滿蠶小暑田小雪麥其收較薄故皆宜早唯赤種一
種稻色尤爲早熟今田家皆有或云江西利或云泰州種人皆
欲芟去之終不能盡上稻種一則

東路田皆種麻無桑者亦種之蓋取其成之速而於晚稻晚豈

仍不害也其工力較菜子相去不遠其收利則倍法於清明前

倒細下種

種必外方者爲佳清撮子每科懸三四十使中間可

容鋤若梅豈科然特蓋用絕灰而不加泥耳守鳥雀數日

用繩及破

竹鷲

既出寸許乃已澆糞二次

每畝一次約清水糞百担

到削二次麻成擇

老晴天刈起晒乾六七月間浸一宿詩所謂東門之池可以漚

麻是也脫其皮每畝盛者可得二百觔

剝法從尾至頭

若陰雨剝之懼

墨爛

屋多者散置廊簷下見風日亦無害

而價損吾鄉種此爲利自浮於東路但

恐業之不精若募人教植一年許卽善其事矣

上種麻一則

湖州家家種苧爲線多者爲布一年植根三時可刈其後不煩

更種稍加肥土足矣若種苧地一分則線可無乏用苧頭更可

入粉爲食 上種芋一則

種芋芟一畝極盛可得萬觔則每日燒柴三十觔之家可供一歲之薪矣少亦得五六千觔二畝當一畝尙優於田地租息也
法用山錐翻根根方五寸許卽易長愈速愈大每科懸二三尺一年一補三年而滿則歲歲唯上泥及斫柴兩次工力但當擇其種之長大者爾斫宜冬至前後早則笋復生經冬而枯次年必衰遲則幹復活滋根者少次年亦不茂若兩年不斫則亦衰以新笋不生故也斫過必加泥近水用河泥近田用稻稈泥開春碎之最宜近水地壠及墳墓旁地近水取其便於簍泥及載薪以歸墳墓旁地必有樹陰覆蓋不便桑麻種之於此則不毛之土

一勞永逸其益無方 上種芋茭一則

種蘿蔔之法以伏天墾倒地二次晒過半月澆濃糞二次則上

鬆而無蟻

大槩大寒冰霜大暑烈日俱能發土殺蟲

白露前深墾下種

子必自收者為佳菜

起毛葉則頻澆清糞就密處漸芸其細者食之每科留三四根

則葉茂而頭大吾鄉土性堅實蘿蔔亦性重而味細實其美大

與太湖異胡蘿蔔亦然以供家用固為便易即賣亦得厚利 本地

蘿蔔價常貴於太湖獨忌壅灰見灰則鬚長而頭分故也若以間地一畝

春種麻麻熟大暑倒地及秋下蘿蔔蘿蔔成大寒復倒地以待

種麻兩次收利亦不減於種菜也 上種蘿蔔一則

甘菊性甘溫久服最有益古人春食苗夏食葉秋食英冬食根

有以也每地論頭種一二枝取其花可以減茶葉之半茶性苦寒與甘菊同泡有相濟之用若種之成畝其利視種荳自倍吾里不種棉花亦有以此爲業者但費採摘工夫及適市貿易耳目混亂耳種植甚易只要向陽脫水而無草肥糞甚省黃白二種白者爲勝上種甘菊一則

種芋無別法只土厚而肥卽頭大子多田間歲一易土則蟻蟮不生入冬方起則味足而甘碩種在地溝則省肥但旱歲不能長又蟮易生湖州俱種地上名爲旱芋爲鄉低故也今以半在地半在田先食於地後食於田秋冬均不匱乏旱芋種出廣德清明時彼處排賣於湖若水芋斷不可種地上上種芋芳一則

百合根既甘美花復芳潔種於桑際無損於桑復不害剝倒或
每年一起或二三年一起俱可塘棲臨平往往如是故百合彼
處多有香芋亦然籬下種山藥其根嘗畱每年食其枝力不勞而得
味多上種百合山藥一則

漢文帝詔歲勸民種樹管子云一年之計樹穀十年之計樹木
吾里無山土亦罕曠然能於地隙水濱種植良材百株三十年
後可得百金以外若種樹成林大小相替材木可無乏用矣每
年芟其繁枝可以爲薪各以地之所宜則桐鄉椿梓榆檀皆上
木也紹興祁氏資送其女費至千金人怪其厚祁曰吾費不過
十金耳人益駭問故曰於女生之年山中人包種杉秧萬株株

費一釐女十六七而嫁杉木大小每株值價一錢則嫁資裕如矣此雖山林與平野不同然智可通也 上種樹一則

農事不理則不知稼穡之艱難休其蠶織則不知衣服之所自
函風陳王業之本七月八章只曲詳衣食二字孟子七篇言王
政之要莫先於田里樹畜今日言及輒笑爲鄙陋是以廉恥不
立俗不長厚然旣治田桑卽不可不兼治圃古者民淳俗朴瓜
瓠俱在疆場今不能然則編籬爲圃一以養生一以禦盜俗籬
用槿易成然實寡用而不固不若間以枳橘雜以五茄皮枸杞
三物有刺可禦暴客又茄皮春摘其芽香美可食冬取其根入
酒尤妙枸杞春可食苗秋可取子根卽地骨皮也枳花香而刺

密實亦有用其成雖須一年五年然久而愈密籬下徧種荳花
自生自長花開隨采以晒亦蔬之輔佐也園中菜果瓜蒡惟其
所植每地一畝十口之家四時之蔬不出戶而皆給 古人場
園同地秋收則築堅圃地爲場以納禾稼至來春則又耕治之
以種菜茹此意湖州鄉間徃徃見之吾鄉殊不然也場唯收成
時一用三時廢棄而已圃則更闢一處不得已則於桑下種菜
謂菜不害桑也其實種菜之地桑枝不茂此不特地力之不盡
亦見人工偷情無足取也古人規制無大小俱有法度何不遵
而行之 上編籬二則

絲瓜宜近水飯瓜宜上棚南瓜形扁北瓜形長蓋同類也

兩歲鄉間

無收貧困或用以療
饑是宜勿絕其種

地蒲宜平地屋蒲宜高棚

可用爲器冬瓜

宜疏菜瓜宜密黃瓜傍水爲棚宜於早種苦瓜倚樹而蔓不厭

遲收

詩藹有苦
葉是也

西瓜土不相宜太湖準亭則多有之胡蘆玩好

而已但可爲器不可爲食

詩云甘瓠
鼎之是也

薑出臨平笋來湖郡茨菇

便於溝際香芋利於牆陰裙帶豈可架可屏刀豈能上不能下

芥菜在地日久根深宜垃圾薑菜在地日少根淺宜清肥茄宜

土實葱韭蒜宜土鬆甜菜四季可食歲一遷秧惟夏月味苦菠

菜越朔方出月杪下子在春秋味甘生菜宜生大頭菜宜熟芹

苗宜淡蒿苣笋宜鹹若乃露葵藟粟諸葛蔓菁蓋非常味譬猶

江瑤海蜃備陳方物可也

上種蔬一則

予旅食歸安見居民於水濱徧插柳條下種白藕莖繞柳條而
上秋冬斬伐柳條可爲栲栳之用每莖一科可收一升吾鄉無
廣澤不徧插柳若藕莖則環宅垣牆及中庭俱可種也法取先
枯者畱爲明年之種則早結其根直下最深若先開深潭先下
垃圾一餅覆其上而後下種則終歲可以不澆培壅全在黃霧
最忌夏至後半月加肥若壅土亦無害秋肥則藤多而結少晚
結經霜則萎柔嫩摘之焙乾可儲以備蔬之乏竭此味鮮食半
載五月至十月乾食亦半載枯莖收貯可以接新專於健脾大
有補益又一種名五九莖蔓不長而結最早植之籬邊亦佳味
也 上白藕莖一則

嘗論基址墳墓各宜思糧之所出墳旁種芋芡便可取薪基址
寬曠則前植榆槐桐梓後種竹木旁治園中庭植果木凡可取
爲祭祀賓客親戚餽問之用卽省市辦金錢中庭之樹莫善於
梅棗香圓橙橘茱萸之類莫不善於桃李杏柿之類蓋物之易
潰不能藏蓄吾所不取茱萸最易生惟欲近水卽陰濕地亦可
橘梅類善蛭橘更性畏寒冬護其枝夏去其蛭則長茂矣湖州
多種茱萸爲醬名曰辣醬入藥曰吳茱萸此味性溫無毒寒天
食之可代椒薑湖州四胡胡椒不可多服食以有毒也茱萸味甚
多服食兼可却瘧痢之病作醬法如湖州則煩若浸子極省力
反覺潔淨每子一觔用石灰四兩化水貯瓶中以沒子爲度一

月後即可食若牆下可以樹桑宜種富陽望海等種每枝大者可養蠶一筐愈老愈茂但不令蟲蛀及水灌其根動以世計上種果一則

自水利不溝湖州低鄉稔不勝淹數十年來於田不甚盡力雖至害稼情不迫切者利在畜魚也故水發之日男婦晝夜守池口若池塘崩潰則衆口號呼籲天矣然湖州畜魚必取草羅螺蚶於嘉興魚大而賣則價錢賤於嘉興蓋吾地魚俱自湖州來及魚至市已離池數日少亦一二日矣故魚瘠而價不能不賤若以湖州畜魚之法而盡力於吾地之池取草既便魚價復高又無潰溢之患損瘠之憂爲利不已多乎陶朱公古法卽不能

用湖州畜法可倣也嘗於其鄉見一隻戒諸孫曰猪買餅以餵
必須資本魚取草於河不須資本然魚肉價常等肥壅上地亦
等奈何畜魚不力乎臨平多畜鱖魚鱖魚食土名曰蕩鱖并不
必撈草池小則畜鱖魚亦一道也鮒魚種臨平買草魚白鰱螺
青諸種本地可買湖州畜魚秧過池名曰花子其利更厚 上養
魚一則

吾地無山不能畜牛亦不能多畜羊又無大水澤不能多畜鴨
少養亦須人看管惟鷺鷥可畜然多畜鷺不如多畜鷺鷥多防
攘竊鷺不憂攘竊鷺食腥則長鷺食草穀而已鷺畜一年不及
五觔鷺三月卽有六觔若非餌種及家用則六七觔卽宜賣邑

有善畜鷄者從市買肉骨碎而飼之又積草於場俟其蒸出雞
蟲日番幾次則鷄不食米麥而肥然此難爲法計惟多畜母鷄
以伏鷺卵可耳鷺雛一隻價貴時銀一錢賤亦六七分卽授人分養舊例平分亦
可然大概雌鷄之利稍厚於雄鷄雄鷄每月長不及半觔雌鷄
生蛋十餘枚可當一觔之值食亦相當若伏鷺卵則息月一錢
而食較省里亦有以畜牛爲利者買瘠牛使童子牽之朝食露
草日飼棉花餅養一二月則牛肥而價倍一牛嘗得數金之息
卽養度馬之智不可爲常上養鷄鷺一則

日用所急薪米二事爲重米取給於田計口而食相去不遠惟
柴薪之費相去甚遠炭及山柴爲上費樹柴次之桑條荳莢又

次之稻柴麥柴又次之然麥柴又不如稻柴以其無灰也田家之灰是一項肥壟商鞅刑及棄灰秦之農事所以山東不敵芣芡亦無灰以其取給於地不待價也總之必待買薪而舉火難乎爲家矣最儉者有燒薯蕷之法另作連竈俗名樓竈用風箱以炊則其費較稻柴倍省而其灰復可以糶治坊用之桑柴灰豈其灰俱可糶白薯蕷粉則青此難爲法吾里冬天用炭屑實是省便竹節更省炭屑杭州江干爲佳價又賤路遠不便則鑪鎮冶坊可糶其價十月擔可二錢五分撈出粗塊約二斗入炊爐可當炭二十筋用其餘八斗每脚爐一事用炭屑一升分晝夜翻入可以無輟火矣若置火缸一事分晝夜翻入二升晝頓滾湯則一日可省燒茶

幾次夜頻清水則早晏可得熱水濯手頰面亦省柴十數觔也
其他烘頓諸物無不便者西鄉專來羅爲蠶簇之用蓋取其不
發熱不驟冷復無厝火不虞之患每至春半則担可四錢矣里
中趨利者往往冬羅春糶又有窖灰者湖州邢窖之灰邢窖近
山燒山柴其竹木之節火力不盡者多存焉種火最便其力雖
不及炭屑之長然價亦止及其半以當班糠則過之矣竹節陳
莊買其值視柴價爲升降風爐火箱俱可用費亦最省 上新炭

一則

酒醪爲糜穀之具宜在所禁但祭祀賓客及力田之農實有所
不能已故蘇湖紹金人家無不釀酒者沽酒比之自釀相去一

倍猶爲廉價也與其沽而費金以輸利於人何如種秫自釀而樽節於已且糟亦日用之不可缺者每年量所應用若干冬春之間僱人造貯更倍其數以爲慶賀餽遺之用亦省備禮之費於義甚無害也但不可因而濫觴耳將造酒六月細麴爲麴每米一石用麴十觔米舂極白浸一月造酒人每石工銀七分酒器自備以糟燒酒用蕭山人釀法不載

上釀酒一則

總論

凡農器不可不完好不可不多備以備忙時意外之需糞桶尤甚諸項繩索及簍簞斧鋸竹木之類因家一闕廢工失時往往因小害大崇正庚辰五月十三日水沒田疇十二以前種者水

退無患十三以後則全荒矣有一人以蓑箬未具不克種田以致饑困俗云爲了一錢饑倒一家蓑衣箬帽一副書云唯事事價貴不過一錢乃其有備有備無患推此可戒其餘世人多金以儻玩器而惜小費以治田器豈非惑之甚乎器用

用人一道自國與家事無大小俱當急於講求種田無良農猶授職無良士也訪求選擇全在平時平時不知擇取臨事無人何所歸咎因其無人而漫用之必致後悔不可便說無人可用人無全好亦無全不好只坐自家不能用耳大約力勤而愿者爲上多藝而敏者次之無能而朴者又次之巧詐而好欺多言而嗜嬾者斯爲下矣貧儉無害頗用之何如耳選用之道無他

論語曰舉爾所知又曰無求備於一人大學曰惟善以爲寶孟子曰如不得已本此義而推行之雖有不得者寡矣若無大過惡切不可輕於進退書曰人唯求舊用慣之人彼知我我亦知彼卽無大利終無大害坦然任之當以更張爲戒惟夫奸宄簒弄不可不察積弊故套不可不被耳

擇良農

自古農人只有勸之一法小雅大田諸詩可考也曾孫田畯其與農夫貴賤懸隔然其相親不啻家人父子今士庶之家驕蹇阿諛使人不堪毋論受者怨之自顧豈不可恥勸之之道中庸曰旣廩稱事別忙閒一也異勤惰一也分難易一也忙閒難易彼人自言不難分別惟惰者與勤者一體則勤者怠矣若顯然

異情於勤則情者亦能不平唯有察其勤者而陰厚之則勤者
既奮而情者亦服至於工銀酒食似乎細故而人心得失恒必
因之紋銀與九色銀所差不過一成等之輕重所差尤無幾假
如與人一兩相去特一錢與三分五分耳而人情之憎與悅遠
別豈非因一錢而并失九錢之歡心因三分五分而併失九錢
五分七分之歡心乎出納之際益爲緊要論語以猶之與人出
納之吝爲惡政之一蓋其人分所應得不求而與之宜也求而
與之斯已後矣可令屢求而後與乎人情緩急朝暮不同早晏
亦異不可不察也酒食益甚豐嗇多寡待農之物所差總亦無
多或缺酒食不過半盞一筋便怏怏而去短少魚肉亦然豈特

缺少冷熱遲速亦所必計諺曰食在厨頭力在皮裡又曰龜邊
荒了田地人多不省坐踏斯弊可歎也唯夫準繩定於平時有
無諒於彼此則有求既無奢望有時不應退無怨心如是則在
者無不滿之心去者懷復來之志切不可乘人之急將低作好
指少爲多
使人有傷心之痛書曰狎侮小人罔以盡其力勞苦不知恤疾
痛不相關最是失人心之大處 工食

農事大綱有三道惟在豫一疆界宜正也田地賦役之所起我
不可以侵人亦不可使人侵我本讓畔之意與其以我侵人毋
寧使人侵我語曰終身讓路不枉百步終身讓畔不失一段若
地段田角與人相間彼此便利則免無可也一溝渠宜濬也田

功水利一方有一方之蓄洩一區有一區之蓄洩一畝亦有一畝之蓄洩漏而不知塞壅而不知疏日積月累愈久而力愈難
燥濕不得其宜工費多而收較薄矣其事係一家者固宜相度
開濬卽事非一家利病均受者亦當集衆修治不可觀望推却
萌私己之心且思大禹平治九州水土興萬世之利何況鄉黨
鄰里被一夫涓滴之澤乎若乃占公爲私損人益己自非人之
所爲矣一塍畝宜修築也吾鄉視海寧爲下旣不憂旱視歸安
爲高亦不憂水圩畝雖不甚重然不時爲修築則地虞壅塌田
患漏洩積久滋弊恒至疆界失其舊所田塍地腳草根盤据所
損亦復不少宜於農隙之月趁晴清理修治則省忙工若閒時

蹉失到插種收成之候便無及矣至於墳墓居址以及道路橋梁凡屬已所當爲雖於農務無關亦當乘隙料理非度外可置也

田功

種田地利最薄然能化無用爲有用不種田地力最省然必至化有用爲無用何以言之人畜之糞與竈灰脚泥無用也一入田地便將化爲布帛菽粟卽細而桑釘稻稔無非家所必需之物殘羹剩飯以至米汁酒脚上以食人下以食畜莫不各有生息至於其大者勤則善心生愛土物厥心減又勿論已筋力有用也逸則脆弱丁口有用也閒則虛靡金錢粟帛有用也薪油耗之酒漿耗之瓜蔬又耗之麻纓絲枲亦耗之儉者耗三之一

奢者過之至其甚者男習惰游女休蠶織長傲誨淫又勿論已
賈子曰治天下至纖至悉也此言雖大可以喻小人能綜其大
綱復不厭纖悉家政其庶理乎

農事
纖悉

吾里田地上農夫一人止能治十畝故田多者輒佃人耕植而
收其租又人稠地密不易得田故貧者賃田以耕亦其勢也嘗
讀孟子曰諸侯之寶三土地人民政事士庶之家亦如此家法
政事也田產土地也僱工人及佃戶人民也田戶終歲勤動祈
寒暑雨吾安坐而收其半賦役之外豐年所餘猶及三之二不
爲薄矣而俗每存不足之意任僕者額外誅求脚米斛面之類
必欲取盈此何理耶且思朝廷一布寬恤之詔百畝之家所益

幾何而歡傳萬口下加徵之令百畝之家所損幾何而怨咨載
道豈非民力不可竭乎大凡田所坐落平日決宜躬履畎畝識
其肥瘠計其寬隘及泥蕩水路莫不盡圖詳記及佃戶受田之
日宜至其室家熟其鄉里察其勤惰計其丁口慎擇其勤而良
者人衆而心一者任之收租之日則加意寬恤僕人積弊極力
革除至於凶災爭訟疾病死喪及災獨貧厄總宜教其不知而
恤其不及須令情誼相關如一家之人可也近見富家巨室田
主深居不出足不及田疇而不識佃戶一任紀綱僕所爲至有
盜賣其產變易區畝而不知者侵沒租入將熟作荒退善良之
佃任與刁黠種種弊端不一而足坐使生計匱索虛糧積累以

致破家亡身無不由此或乃恃目前之豪橫陵虐窮民小者勒其酒食大者逼其錢財妻子寘之獄訟出爾反爾可畏哉

佃戶

西鄉女工大槩織綿紬素絹績苧麻黃草以成布疋東鄉女工或雜農桑或治紡績若吾鄉女工則以紡織木棉與養蠶作綿爲主隨其鄉土各有資息以佐其夫女工勤者其家必興女工游惰其家必落正與男事相類夫婦女所業不過麻桑繭絲之屬勤惰所係似於家道甚微然勤則百務俱興惰則百務俱廢故曰家貧思賢妻國亂思良相資其輔佐勢實相等也且如匹夫匹婦男治田地可十畝女養蠶可十筐日成布可二疋或紡棉紗八兩寧復憂饑寒乎刺綉淫巧在所當戒

女工

凡事各有成法行法在人中庸曰文武之政布在方策其人存則其政舉其人亡則其政息家政亦如之歸安茅氏農事爲遠近最吾邑莊氏治桑亦爲上七區首今皆廢棄一者由天荒亂而盜起也一則由人膏粱之久不習稼穡艱難也司馬溫公居洛有田三頃躬親庶務不舍晝夜劉忠宣公教子讀書兼力農曰困之將以益之宴安害人遊閒廢事古之人無不懼之今農書所載者法也苟非其人法不虛行行法之要一曰忠信一曰精勤忠信以待人則人無不盡之心精勤以立事則事無不成就之勢要之忠信本也衛詩星言夙駕稅於桑田言勸課之勤也而終之以秉心塞淵騁壯三千言其操心誠實而淵深故雖畜

馬之衆亦至於三千也農桑之務用天之道資人之力興地之利最是至誠無僞百穀草木用一分心力輒有一分成效失一時栽培卽見一時荒落我不能欺彼彼亦不欺我却似末世人情作僞難處也然與世人相交農終易處以僱工而言口惠無實卽離心生風興夜寐卽朝氣作俗曰做工之人要三好銀色好吃口好相與好作家之人要三早起身早煮飯早洗脚早三好以結其心三早以出其力無有不濟推之事事殆一轍也

習勤

人言耕讀不能相兼非也人只坐無所事事閒蕩過日及妄求非分營營朝夕看得讀書是人事外事又爲文字章句之家窮

年累歲而不得休息故以耕爲俗末勞苦不可堪之事患其分
心若專勤農桑以供賦役給衣食而絕妄爲以其餘閒讀書修
身儘優游也農功有時多則半年諺云農夫半年閒况此半年
之中一月未嘗無幾日之暇一日未嘗無幾刻之息以是開卷
誦習講求義理不已多乎竊謂心逸日休誠莫過此

附

淡黃蘗方

七八月洗蘿蔔菜入陶器浸以黃米飯湯日撥二三次越三日
菜色變即可食間以小白菜代之特傷脾量家所需以裁多寡
多則易敗也忌白米及秬米釜將沸乃出其菜澄前汁去其滓

仍入陶器加新菜新湯并浸之菜生熟俱可食佐肉佐蔬俱美
調以鹹醬及薑惟醃不宜入入醃過酸汁作羹佐食尤美薑心
既生鹹醬冬日未至接濟之功此君爲多桐崇湖州家備此味
病餘食粥言念老友久疎特書厥方以告庖者

壅田地定額 戊戌

三月至九月糞俱上地垃圾俱入田八月至二月糞俱入田垃
圾俱上地糞有限垃圾多少無限糞不足以垃圾補之

拔蛇法

凡蛇入穴人用力逆拔雖至斷而必不可出法用繩繫其尾而
縛竹如弓以懸之不終日而蛇出矣蓋人力與蛇堅相持則易

至於斷斷則其後不可復出彎竹之力恒急而不驟不至於斷
但不可復入耳至蛇力稍怠則不虞而輒出矣是有至理予於
此悟去惡止邪之道

削草

削地入一二寸許則下土俱鬆草屢起屢削雖不去根而亦死
樹木屢伐枝葉則根亦死故曰披其枝者傷其心然則人苟能
革面亦未嘗不可漸至於革心也